

ТҮРҮҮЧ БАЙЛДАГЧИЙГ ХУГАЦАА ДУУСАХААС 3 ХҮРТЭЛ САРЫН ӨМНӨ БЭЛТГЭЛЭЭР ХАЛАХ ЖУРАМ

Нэг. Нийтлэг үндэслэл

1. “Зэвсэгт хүчний тухай” Монгол улсын хуулийн 15 дугаар зүйлийн 4дэх хэсгийн 16 дахь заалтад “Зэвсэгт хүчний Жанжин штабын дарга албаа үлгэр жишээчээр хааж, цэргийг зохих мэргэжил эзэмшсэн хугацаат цэргийн алба хаагчийг цэргийн албаны хугацаа дуусахаас 3 хүртэл сарын өмнө халах эрхтэй” гэж заасны дагуу цэргийн албаа үлгэр жишээчээр хааж байгаа хугацаат цэргийн алба хаагчийг хугацаа дуусахаас 3 хүртэл сарын өмнө халахад энэ журмыг дагаж мөрдөнө.

2. Хугацаа дуусахаас 3 хүртэл сарын өмнө халах, албаа үлгэр жишээчээр хаасан хугацаат цэргийн алба хаагчийн тоог ангиудын захирагчийн тодорхойлолтыг үндэслэн ЗХЖШ тогтооно.

3. Зэвсэгт хүчний анги /салбар/-ууд албаа үлгэр жишээчээр хаасан хугацаат цэргийн алба хаагчийг хугацаа дуусахаас 3 хүртэл сарын өмнө халахдаа “Цэргийн дотоод албаны дүрэм”-ийн 67 дугаар зүйлийн 4 дэх заалтын дагуу цэргийн алба хаагчийг бэлтгэлээр халах ёслолын ажиллагааг зохион байгуулж үднэ.

4. Хугацаа дуусахаас 3 хүртэл сарын өмнө халагдсан хугацаат цэргийн алба хаагчийн тээвэр, хоол, хүнс, байрны зардлыг аймаг /нийслэл/ хүртэл Цэргийн мэргэжлийн дээд удирдлагын байгууллага, хороо /сум/-ны төв хүртэл Төрийн захиргааны болон орон нутгийн байгууллага тус тус хариуцна.

Хоёр. Цэргийн албаа үлгэр жишээчээр хаасны шалгуур үзүүлэлтүүд

А.Түрүүч нар:

1. Цэргийн дотоод албаны дүрмийн 3 дугаар бүлгийн 109, 110, 11 дүгээр заалт /ротын жагсаалын дарга, салааны захирагчийн орлогч, тасгийн захирагчийн үүрэг/-ыг дүрмийн дагуу алдаа мадаггүй биелүүлсэн байх;

2. Сурлага, сахилгаараа тэргүүлж, сургалтын үе шатны, төгсөлтийн болон ЗХЖШ-ын даргын цогцолбор шалгалтад “Онц” сурлагын амжилт үзүүлсэн байх;

3. Салаа, тасаг /тоот, экипаж/-аа байлдаанд удирдах дадлага, чадвар эзэмшсэн байх;

4.Эелдэг зан харьцаа, биеэ авч явах, бусдад үлгэрлэдэг, харилцааны соёлд суралцсан байх;

5. Алба хаах хугацаандаа захирагч дарга нараасаа 8-аас доошгүй удаа сайшаал хүртсэн байх;

6.Сайшаалын болон гачигдлын чөлөөнөөс гадна ээлжийн журмаар эдэлсэн түр цагийн чөлөө 10 хоногоос хэтрээгүй байх;

7. Цэрэгжлийн спортын болон нийтийн биеийн тамирын уралдаан тэмцээн, урлаг уран сайхны ажилд идэвхитэй оролцож, тодорхой амжилт үзүүлсэн байх;

8.Салбар, салаа, тасгаас нь сахилгын, харилцааны, өмч хөрөнгийн холбогдолтой хэрэг зөрчил гараагүй байх;

9. Салбар, салаа тасаг нь сахилга, сурлага, хөдөлмөр бүтээлийн амжилтаараа тэргүүний хамт олон алдар хүртсэн буюу эхний 5 байрт шалгарсан амжилт үзүүлсэн байх;

10. Жагсаалын болон биеийн тамирын хичээлийг удирдах дадлага, чадвар эзэмшсэн байх;

11. Бие бялдрын шалгуур үзүүлэлтийн нормыг бүрэн хангасан байх;

12. Ээлжийн болон түр цагийн чөлөөгөөр явах үедээ цэргийн дүрмийн шаардлагыг чанд сахин биелүүлж, нийгмийн дэг журмыг хэлбэрэлтгүй сахин мөрдөж, чөлөөнөөс хоцроогүй байх;

13. Ёсолж хүндэтгэх журмыг дүрмийн дагуу цэвэр үзэмжтэй, үлгэр жишээч гүйцэтгэж хэвшсэн байх;

Б. Байлдагч нар:

1. Цэргийн дотоод албаны дүрмийн 3 дугаар бүлгийн 113, 114 дүгээр заалт /байлдагчийн үүрэг/-ыг дүрмийн дагуу мадаггүй чанд сахин биелүүлсэн байх;

2. Цэргийн сургалтын үе шатны сургалтуудад сайнаас онц, төгсөлтийн болон ЗХЖШ-ын даргын цогцолбор шалгалтад “Онц” сурлагын амжилт үзүүлсэн байх;

3. Сахилгын, харилцааны, эд хөрөнгийн зөрчил, дутагдал гаргаагүй, холбогдоогүй, өөртөө болон нөхөртөө анхаарал халамж тавьдаг байх;

4. Эелдэг зан харьцаа, биеэ авч явах бусдад үлгэрлэдэг харилцааны соёлд суралцсан байх;

5. Алба хаах хугацаандаа 6-аас доошгүй удаа захирагч, дарга нараасаа сайшаагдсан байх;

6. Сайшаалын болон гачигдлын чөлөөнөөс гадна ээлжийн журмаар эдэлсэн түр цагийн чөлөө 10 хоногоос хэтрээгүй байх;

7. Цэрэгжлийн спортын болон нийтийн биеийн тамирын уралдаан тэмцээн, урлаг, уран сайхны ажилд идэвхтэй оролцож, тодорхой амжилт үзүүлсэн байх

8. Ээлжийн болон түр цагийн чөлөөгөөр явах үедээ цэргийн сахилгын дүрмийг чанд биелүүлж, нийгмийн дэг журмыг хэлбэрэлтгүй сахин мөрдөж, чөлөөнөөс хоцроогүй байх;

9. Ёсолж хүндэтгэх журмыг дүрмийн дагуу цэвэр үзэмжтэй гүйцэтгэж хэвшсэн байх;

Гурав. Албаа үлгэр жишээчээр хаасан хугацаат цэргийн алба хаагчийг шалгаруулах

1. Зэвсэгт хүчний ангиуд сургууль, байлдааны салбарын цэргийн алба хаагчдын хурлаар хугацаанаас 3 хүртэл сарын өмнө халагдах хугацаат цэргийн алба хаагчдын нэрийг хэлэлцүүлж, хамгийн олон санал авсан түрүүч, байлдагч нарыг тоон дарааллаар нь шалгаруулна.

2. Шалгарсан хугацаат цэргийн алба хаагчдын нэрийг тухайн ангийн захирагчийн зөвлөлийн хурлаар хэлэлцэн баталж, ЗХЖШ-т хүргүүлэн ЗХЖШ-ын даргын тушаалаар баталгаажуулснаар хугацаанаас өмнө халагдах хугацаат цэргийн алба хаагчдын тоо, нэр хүчин төгөлдөр болно.

Дөрөв. Бусад асуудал

1. Албаа үлгэр жишээчээр хааж хугацаанаас 3 сарын өмнө халагдсан ч эзэмшсэн цэргийн мэргэжлийн дагуу цаашид албаа гэрээгээр хаах хүсэлтэй хугацаат цэргийн алба хаагчдад 2 сарын амралт эдлүүлсний дараа эргүүлэн ангид нь гэрээт цэргийн албанд элсүүлэн авч болно.

2. Боловсрол, мэргэжлийн ур чадвар нь ахлагчийн албанд тэнцэх түрүүч, байлдагч нарыг ахлагчийн сургуульд элсэх уралдаант шалгалтад оруулж болно.